



Sesida dals

Communitgà ils

Protocol nr.

15 d'october 2019

18 d'october 2019

760

Dumonda Hardegger

concernent l'introducziun d'in sector da sanadad a la SATE Cuir

Resposta da la regenza

En la sessiun d'avust 2019 ha il cussegl grond discutà davart il rapport e davart la proposta da la cumissiun per politica da stadi e strategia (CPSS) concernent las finamiras ed ils princips surordinads per la perioda da planisaziun 2021 – 2024 dal program da la regenza e dal plan da finanzas. Cun la finamira politica surordinada nr. 10 "Sistem decentral da sanadad" duai vegnir garantì in provediment da la sanadad decentral e d'alta qualitat sco er prendì en mira da stabilisar ils custs e d'adattar las structures als svilups currentes en il sector da sanadad. En las directives vegn explitgà che differents svilups mettian las structures existents en il sector da sanadad sut grond squitsch e ch'i saja perquai indispensabel da reorganisar e d'adattar quellas. En tut il territori chantunal sto vegnir garantì in provediment da basa d'alta qualitat. Tranter auter cun s'occupar activamain da la mancanza da persunas specialisadas en il sector da sanadad e cun coordinar pli ferm tranter ils differents furniturs da prestaziuns da sanadad.

Perquai che la conscienza da sanadad crescha e perquai ch'ils martgads da sanadad vegnan internazionalisads, s'avran per il Grischun schanzas en il turissem da sanadad, nua ch'i resultan sinergias tranter ils furniturs da prestaziuns ed il turissem. Quest svilup èsi da trair a niz cun purschidas d'alta qualitat.

Sa basond sin questas explicaziuns e resguardond la strategia chantunala da scola auta e da perscrutaziun pon las dumondas vegnir respundidas sco suonda:

Tar la dumonda 1: En connex cun l'introducziun d'ina purschida da scolaziun en il sector da sanadad a la scola auta specialisada dal Grischun (SASGR; fin ils 31 d'avust 2019 SATE Cuir) ston l'emprim vegnir scleridas en moda cumplexsiva las finamiras e las utilisaziuns potenzialas d'ina tala purschida per il chantun, damai

che l'installaziun d'in nov champ d'activitad è collià cun custs supplementars e cun lavur supplementara considerabla. Il center da furmaziun per la sanadad ed ils fatgs socials (CSS) ha fatg – en il rom da l'incarica da prestaziun 2017–2020 – emprims scleriments preliminar en chaussa che pon servir sco basa per l'ulteriura lavur. Ultra da quai pretenda l'extensiun dal champ d'activitad da la SASGR in'adattaziun da l'art. 10 da la lescha davart las scolaz autas e la perscrutaziun (LSAP; DG 427.200). La regenza parta dal fatg che la SASGR pudess porscher suletta la scolaziun da bachelor en il sector da sanadad, entant che studis da master cuntinuants, spezialitads u accents da perscrutaziun stuessan vegnir coordinads cun auters partenaris da scola auta.

Tar la dumonda 2: Partind da las mesiras menziunadas e dal fatg che las basas per annunziar ina nova purschida da scolaziun stuessan vegnir stgaffidas almain in onn avant ch'il studi cumenza e che la finanziaziun stuess vegnir garantida a lunga vista, è sia introducziun pussaivla cun il cumenzament da l'onn da studi 2023/24. D'examinar fiss eventualmain la dumonda, sch'in studi da bachelor pudess vegnir preparà uschia, ch'in studi da pilot pudess cumenzar gia l'atun 2022.

Tar la dumonda 3: L'introducziun d'ina nova purschida da scolaziun en il sector da sanadad a la SASGR sto resguardar prescripziuns chantunalas e naziunalas correspundentas per il sector da sanadad. Plinavant pretendan talas scolaziuns – ultra da l'accreditaziun instituziunala da l'instituziun che porscha la scolaziun (per la SASGR è quella da princip avant maun) – er l'accreditaziun da programs a temp util dal studi correspondent. Sche cooperaziuns cun auters partenaris èn pussaivlas e raschunaivlas, sto vegnir examinà detagliadamain en il rom d'in project da planisaziun correspondent. Decisivs en quest connex èn ils interess specifics menziunads dal chantun, ma er il potenzial d'instituziuns partenarias pussaivlas, uschia per exempel quellas dal chantun Tessin e dal CSS a Cuira. Correspundentmain è la regenza pronta da nominar ina grupp da planisaziun ch'examinescha l'extensiun da la purschida da scolaziun da la SASGR sin il sector da sanadad sco er ils custs correspundents che resultan tras quai e che propona mesiras.



En num da la Regenza

Il president:

Il chancelier:

Dr. Jon Domenic Parolini

Daniel Spadin